

boli interdum fieri potuerit; aliquam submergi Sagam nequissime, uti paucos ante annos accusata veneficii profugit ex vinculis, ad probandam innocentiam veneficii accusati se in aquam trudit, submergi verò non potuit; Interim tamen ex iis Jus sumi debere, specialesque eà de re condi Leges, nullò modò, nullavè unquam defendi posse ratione videtur. Jura quippe constitui oportet in his, quæ ut plurimum; non etiam quæ ex opinato & fortè uno aliquo accidunt casu. Leges etiam ad ea potius aptari debent, quæ frequenter, quàm quæ rarò eveniunt. Quæ enim semel aut bis existunt, meritò prætereunt Legislatores. *L. 3. 4. 5. & 6. ff. de LL.* Quòd verò contraria Exempla non produci possint, simpliciter negatur. Huic occurrit Gœdelm. *d. l. 3. cap. 5. n. 35. pag. 45.* his verbis: *Cum anno 1588. ex Borussia in Livoniam proficiscerer, invitavit me in via quidam prædives & opulentus Nobilis in suam Arcem; Hic cum veneficam sequente die propter enormia delicta, quæ suâ magicâ & diabolicâ arte commiserat, jam ad ignem condemnasset: Quæsi, num illam quoque prius in aquam more solito conjecisset, ad experiendum utrum rea esset, eo negante monui, ut id tentaret, (volui enim ea ratione inquirere, num hæc exploratio per aquam frigidam vera esset, nec ne, sed ecce postquam venefica à carnifice in aquam gelidam colligatis artubus fuit projecta, statim submersa est. Is postea ad me scripsit, se cum sex veneficis captivis idem tentasse, at omnes fuisse submersas, & in fine literarum scribit: Jam demum tibi credo, signum hoc falsum, diabolicum & furiosum esse & Magistratum incautum decipere posse. Hæc illi.*

Si itaque Exempla approbanda, bona & verosimilia, non verò Diabolica & Tyrannica amplectenda sunt. Lotharius in *Lomb. Jur. lib. 2. d. tit. 55.* vid. Lindenbrogium in *Codice LL. antiquarum.*

Et hæc Exercitii gratia proposuisse sufficiat, licet non omnibus pro ingenii tenuitate satisfacere licuerit.

Interim tamen DEO TER OPTIMO MAXIMO
pro viribus præstitis sit Laus, Honor & Gloria,
in sempiterna Secula!